

Mazarin
3501

Requeste presentee a monseigneur

RARE BOOK
COLLECTION



THE LIBRARY OF THE
UNIVERSITY OF
NORTH CAROLINA
AT
CHAPEL HILL

Mazarin
3501

UNIVERSITY OF N.C. AT CHAPEL HILL



00023010297

Très bonne piece 3501 52

REQVESTE

PRESENTEE
A MONSEIGNEVR
LE PRINCE

PAR
LES VIGNERONS
DE SON GOVERNEMENT

DE BOVRGONGNE.

En vers Burlesques.



A PARIS,
Chez NICOLAS BESSIN, Imprimeur & Libraire, au Palais,
en l'allée S. Michel : Et rue des Carmes,
au mont S. Hilaire.

M. DC. XLIX.

REQVESTE PRESENTÉE
à Monseigneur le Prince par les Vignerons
de son Gouvernement.



VOS SUPPLIANT tres-humblement
 Ceux de vôtre Gouvernement,
 Dont la main façonne la vigne
 D'auoir audience benigne ;
 La grandeur que vous possédez,
 Fait que si vous nous accordez
 De parler avec hardiesse,
 Nous vous appellerons Altesse,
 Et tous les autres plus beaux mots,
 Qui peuuent rehausser vn los.
 DISANS que toute nôtre troupe,
 Qui ne met de l'eau qu'en sa soupe,
 Honoroit vôtre Geniteur,
 Qui l'aymoit aussi de bon cœur ;
 Puis qu'il chinquoit à tasse pleine
 A longs traits & perte d'haleine,
 Dedans Paris, & dans Dijon
 Nôtre vin qu'il trouuoit si bon :
 Que depuis la méchante guerre
 Que le Diable mît sur la terre
 Le matin d'apres le Roy boit,
 Aucun batelier on ne voit
 Ramer, pour Paris, sur Yonne,
 Afin de luy vendre la tonne,
 De nos vins plus delicieux,
 Et rapporter des escus vieux :
 Que pas vn de nous n'est plus riche,
 Que le plus-aisé deuient chiche,
 Que manquans de ce reuenu,
 On nous verra bien tôt le cu :
 Qu'vn naturel de la Bourgongne,
 A priuilege d'estre yurongne,

Sur tous nous autres Vignerons,
 Qui sommes tres-bons biberons;
 Qu'ayans gardé nos caues pleines,
 De ce jus pour emplir nos veines,
 Le reste doit aller par eau,
 L'appelle à témoin Montereau,
 Et de là couler sur la Seine
 Sans aucun obstacle & sans peine
 De gen-d'armes & d'ennemis,
 Pour estre beu dedans Paris.
 Pour nous y porter davantage
 Il amis à bas le peage,
 Les entrées, & les impôts,
 Et chassé leurs mouchars dispôts,
 Tant de ses ports, que de ses portes,
 Qui faisoient comme des cohortes;
 Et banny les rats des celiers,
 Pires que les rats des greniers.
 Que cette ville nous dedaigne
 N'ayant plus nôtre jus de vigne,
 Qu'enfin nous craignons son rebut,
 Ne luy rendant plus ce tribut;
 Ce tribut pourtant volontaire,
 Mais qui nous est si necessaire:
 Que Bacchus fâché contre Vous
 Nous fait ietter à vos genoux;
 Qu'il dit que iamais vôtre Pere
 Contre luy ne fut en colere,
 qu'il n'empeschoit point ses bateaux
 De porter y-là ses tonneaux,
 Ny mesme sa douce moutarde,
 Dont le Badault se papelarde
 Alors qu'il mange le matin
 De la saulcice ou du boudin,
 Ou bien quelque fameuse andouille,
 Faisant la nique à la patrouille;
 Et de plus, tant il estoit bon
 D'y porter du bois & charbon,

Afin

3
Afin que la Dame bourgeoise,
Plus que son sire Ian-matoise,
En chaufast sa fesse à loisir,
Selon qu'elle en auroit desir;
Et qu'Alizon la harangere,
Plus méchante qu'une megere
Le couuast dedans son baquet
Le soufflant souuent d'un gros pet;
Qu'aussi sa voisine Louyse
En bruslât souuent sa chemise,
En ayant tout plain un chaudron
Pour cuire & croquer le maron;
Que toutes marquassent leur cuisse
Près l'endroit d'où la femme pisse
De maint & de maint maquereau
Qui dure iusqu'au renouveau:
Qu'aussi nôtre main liberale
Dessous l'autorité royale,
Luy payoit toujours promptement
Son plat & son appointement:
Que ce Prince estoit politique,
Qu'il sçauoit mesmes la pratique,
Qu'il estimoit les parlements,
Qu'il calmoit les souleuements,
Qu'il estoit deuot à l'Eglise
Où S. Pierre a sa chaire mise;
Qu'il aymoit les Religieux,
Et faisoit des actes pieux;
Qu'il ne vuidoit point leur besace
Qu'il aymoit la Dame Fricace,
Qui faisoit bien les saupiquets,
Qu'il haïssoit les affiquets,
Et toutes les femmes infames,
Qu'il prisoit les honnestes Dames,
Que sans iurer ie nom de Dieu,
Il iuroit seulement mebieu,
Qu'il payoit toujours le salaire,
Et mesmes son Apothicaire

Estant encor sur le bassin,
 Aussi-bien que son Medecin.
 Qu'en son temps on voyoit nos filles
 Belles, honnestes & gentilles,
 Dancer sous l'orme à petits bonds,
 Ainsi que de petits moutons;
 Que nos Gars plus remplis d'audace
 Se faisoient souuent la grimace,
 Estans l'un de l'autre jaloux
 Qui seroit plutôt leur époux;
 Qu'ils estoient en bonne posture
 Avec beaux gants, belle ceinture,
 Avec du volet au chapeau,
 Et des touffets au renouveau:
 Que la fluste alloit en cadence;
 Que si dans ou dehors la dance
 Quelqu'un vouloit de son grouin
 Choquer le muzeau de Catin,
 Que l'Ayeul y prenoit bien garde,
 Encor mieux la mere moucharde,
 Qui les contenoit dans l'honneur.
 CE CONSIDERE', Monseigneur,
 ATTENDV que la chose est claire,
 Que comme heritier de ton Pere,
 Tu dois aymer semblablement
 Les gens de ton gouuernement,
 Et plus que tous la rouge trongne
 Des Vignerons de ta Bourgogne,
 Et boire avec eux de leur vin,
 Qui vaut mieux que celui du Rhin:
 Que c'est chose fort lamentable
 De te voir si souuent à table
 Brinder avec les Allemans,
 Qui sont pis que les Musulmans,
 Qu'au lieu de t'en faire vne escorte,
 Tu dois renvoyer leur cohorte,
 Puis qu'estans saouls comme pourceaux
 Ils iettent le vin des tonneaux:

Que l'Estranger ne vient en France,
 Que pour augmenter sa cheuance,
 Témoin les hupez Polonois,
 Qui font pis qu'un voleur ez bois;
 Que de peur la fille à Cardine,
 Les voyant a fait sa gesine,
 Que les Belges, & les Marans
 Tiennent Paris dessus les rangs,
 Disans que l'on pille son Isle,
 Au lieu d'aller prendre Aire & l'Isle.
 Que les dogues cruels d'Anglois,
 Ne craignent d'irriter les Rois,
 Ayans d'une main sanguinaire
 Meurtry leur Roy si debonnaire:
 Que tous les Princes Estrangers
 Redoutent de pareils dangers,
 Que c'est au puissant Roy de France
 De les tenir en asseurance,
 Luy qui tient les cœurs pour certain
 De tous ses subiets en sa main:
 Qu'icy l'on parle tout de mesme,
 Et que Paris a le teint blesme
 De voir ieûner tous ses enfans
 Par le moyen des Partisans,
 Partisans de sac & de corde,
 Lesquels ont semé la discorde,
 Peur de monter les échelons
 De cett'échelle à reculons
 Qu'on dresse contre vne potence,
 Priuilege de leur naissance:
 Que l'vsure auecque le prest
 Ruine tout par l'interest;
 Qu'au lieu de voler nôtre maille,
 Qu'il faut que l'Estranger s'en aille,
 Sur tout le traistre Sicilien
 Qui iamais ne nous fit du bien;
 Qu'il a causé tant de vezardes,
 Qu'il luy faut donner des nazardes:

8
Que les Gaulois ensemblement
N'ayment pour leur gouvernement,
Que leur Roy, leur Reine, & leurs princes,
Et non les gens d'autres prouinces,
Qui sont desia par les Edits
Du Ministeriat interdits :
Qu'aussi la Seine n'est plus libre
Qui triomphoit plus que le Tybre,
Qu'elle te demande son Roy,
Qu'elle auouera que c'est par toy,
Que Paris l'aura dans son Louure,
Et que la paix elle recouure :
Qu'alors nos princes pour certain
Se claqueront tous dans la main :
Que cette fameuse Riuiere
Contre toy se montra tres-fiere,
D'auoir veu de si grand matin
Mener son Roy dans S. Germain :
Que tu la vids si fort enflée,
Et son Onde si boursouflée,
De t'estre saisi de Corbeil
Qu'elle ne t'y fit point d'accueil ;
Ains qu'elle sortit de brauade
En dépit de ton estacade,
Et te fit gaigner les lieux hauts,
Craignant la fureur de ses eaux :
Qu'alors elle te fit la figue,
Telle que receuroit la Digue
Qui voudroit fixer le courant
De quelque furieux Torrent :
Qu'elle publia que sa gloire
Estoit de voiturier à boire
A Paris pour tous ses Enfans
Qu'elle nourrit depuis mille ans :
Qu'en vain on l'appelle Nourrisse,
Si sa mamelle s'appetisse,
Et qu'on empesche le concours
Du Vin qui luy vient tous les iours ;

9
Sur tout de la Dame Bourgogne,
D'où vient sa meilleure besongne,
Qu'elle peut empescher Meudon
S'il te voyoit à l'abandon
Roder le long de son finage,
De se vanger de son dommage;
Que desia son Curé Rablais
A pris la poste & le relais
Afin d'en tirer la vengeance
Par sa langue, ou bien par la lance
De son Geant Pentagruel
Qui te doibt combattre à Ruël;
Que tu dois craindre cette épreue,
Et faire avec luy paix, ou trêue,
Que ce drole enfant de Chinon,
Est vn étrange Compagnon,
Que si tu l'empeschés de boire,
Il te noircira dans l'histoire
D'auoir maintenu le dessein
D'empescher de venir le Vin,
Et que les Vignes on ne taille
Pour remplir l'autra an la futaile;
D'auoir brussé les Echalas
Qui sont ses suposts & ses bras:
Que l'on void manquer la farine,
Que touî-jours nostre vin define,
Qu'au chault il pallit au tonneau,
Et deuient moins bon & moins beau.
Qu'enfin la France se cantonne
Suiuant que chacun se l'ordonne,
Que tel cause du defarroy,
Qui ne connessoit que son Roy;
Qu'on te peut causer vn encombre,
Qu'vn petit buisson fait grand' ombre;
Que tel qui suiuoit ton parti,
Suiura ton frere de Conti:
Que Bellonne, avec les Furies
Vous peut animer aux Tûries,

Que leurs Couleures, & flambeaux
 Hacheront vos Gens en lambeaux,
 Et par vne iniuste colere
 Le frere combatra son frere:
 Que les François t'en blâmeront,
 Que nos Ennemis en riront,
 Que voyans chez nous ces disgraces,
 Il pouront reprendre leurs Places.
 Que pour nous autres Vignerons,
 Nous irons chez les forgerons
 Pour achepter quelque Alumelle
 Qui donnera baille-luy-belle
 Aux plus fiers de nos Ennemis
 Qui deuant nous se seront mis:
 D'autres empoignans leur besoch
 En donneront sur la caboche;
 D'autres auec le Coutelas
 Qui seruit iadis à Contras,
 Et dans Auneau contre les Reîtres,
 Couperont la gorge des Traîtres:
 D'autre iurans par la marbieu,
 Les trauerferont d'un épieu
 Du tupet iusques à la nuque
 En foulant aux pieds leur perruque.
 Que plusieurs oyans le tocsain
 Sortiront vne broche en main,
 Et la passeront dans le foie:
 Du premier trouué dans leur voye:
 Que nous ferons tous chic, chac, choc,
 Sans redouter le tic, tac, toc
 Qu'on nous fera de l'Escopete,
 Ny le tembour, ny la trompette;
 Attendu qu'enfin nos garçons
 Lairront nos Vignes sans façons,
 Qu'il en moura dans la helmée,
 Que l'on verra leur bien-aymée
 Qu'ils recherchoient pour épouser,
 De maintes larmes s'arrouser:

Qu'on verra maint & maint Veuage,
 Et nos filles sans mariage,
 Ayant mal passé leur Printemps,
 Monter en grene avant le temps;
 Si qu'à la fin de nostre course
 Nous verrons tarir nostre source.
 IL VOUS PLAISE, braue Seigneur,
 Remettre la France en honneur,
 Et dans Paris la grande Ville
 Ramener nostre Roy pupille,
 Sa Mere Regente, & la Cour,
 Déboucher Paris tout autour,
 Luy rendre Amour au lieu de haine,
 Ouurir les passages de Seine,
 Remettre en sa grace Corbeil
 Dont tu luy faisois vn écueil:
 Montrer deormais ton Courage
 A luy donner libre passage
 De Montereau iusqu'à Paris,
 Pour faire boire nos Amis:
 Et sur tout d'aimer la Bourgongne;
 D'auoir toû-jours grande vergongne
 De boire autre vin que du sien,
 Ne la fâcher iamais en rien:
 De fauoriser nostre Yonne
 En portant nos vins dans la tonne,
 D'estre toû-jours son Protecteur,
 Ainsi qu'estoit ton Geniteur:
 D'en bannir la maudite race
 Qui nous a mis à la besace,
 Partisans & faiseurs de prests,
 Qui n'ont Dieu que leurs intersts:
 D'oster l'impolt & le peage
 Qui ne sont de l'ancien vſage
 De prier Dieu soir & matin,
 Ne point hanter le Libertin,
 Garder la Loy que Dieu nous donne,
 Honorer la triple Couronne,

Prendre le conseil des Vieillars,
 Ecarter ces ieunes raillars
 Qui ne sont propres qu'à la dance,
 Et qui font vn Dieu de leur pance:
 De chasser bien-loing l'Estranger,
 Qu'il ne nous vienne rauager,
 De garder le bien aux familles,
 L'honneur à nos femmes & filles,
 D'oster loing de nous les Soldats,
 Les Intendans, & les Goujats;
 Les mener en Flandre en personne,
 Pour augmenter nostre Couronne;
 Et tout ainsi qu'un tourbillon,
 Foudroyer le fier Bataillon
 Du Maran qui nous fait la Guerre,
 Et mettre son orgueil par terre:
 Et de là pour venger les Roys,
 Porter le flambeau chez l'Anglois,
 Et par les feux & la fumée
 Reduire en cendre son Armée.
 Puis dans ton escadron épais
 Venir nous rapporter la Paix:
 Garder les Loix & la Police,
 Faire bien rendre la Iustice,
 Proteger les honnestes gens
 Qui sont dedans les Parlemens,
 Faire qu'en loyale franchise
 Le Marchand face marchandise,
 Faire traualier l'Artisan,
 Et bien viure le Courtisan,
 De faire punir de la corde
 Ceux qui nous boutent en discorde,
 D'empescher qu'aucun estranger
 Ne vienne en France se ranger,
 Pour entrer dans le Ministère,
 Dont est à présent le mystere;
 Sur tout d'en chasser Mazarin,
 Monseigneur, ET VOUS FEREZ BIEN.

